

## Carl-Heinz Dirks: Prahlpreken Keerlke 2019

"Wat maakst du denn an d' 15. November tegen Avend?",  
hett he mi fraagt, "daar hest doch wiss noch nix vör?"

"Daar hebb ik Kaarten för ...", wull ik seggen,  
man de Anroper snee mi dat Woord of.

De Anroper, dat was Hans Freese,  
un as he mi verraden dee, well de Keerlke van 't Jahr hebben sall,  
do kunn ik blot noch van JA seggen. Un dat DOO IK GEERN."

Is ok so. Vandaag bün ik weer leep geern hier. In Middens.  
Midden in Oostfreesland.

Midden in de plattdüütse Welt.

Tomiddenst so ruug overslaan. [ "So over de Duum peilt" ...  
seggen wi neet.]

Ja, ji können hier wat leren!

So to 'n Bispill, dat de Chinesen menen ... un daarvan overtüügt sünd,  
dat China dat Riek middent in de Welt is.

Un neet to vergeten de Lüü ut Larrelt!

Daar gifft 't 'n heel olle Spröök, de heet:

**"Larrelt ... liggt midden in de Warrelt!"**

Wenn een van jo dat verbaast of mientwegen ok verwunnert:

Daar hett al de grote Dichtersmann Joachim Ringelnatz over  
schreven, de ut Sassen stammt, man an de See sien Heimat funn:

Überall ist Wunderland.

Überall ist Leben.

Bei meiner Tante im Strumpfenband

Wie irgendwo daneben.

Wenn du einen Schneck behauchst,  
Schrumpft er ins Gehäuse.

Wenn du ihn in Kognak tauchst,  
Sieht er weiße Mäuse.

Man ik mutt mi neet oflenken laten!

Wieder geht 't!

Wat mi, ja, ... wat mi verbaast, dat is neet, dat wi vannavend hier in  
Middels in disse moje Kroog sitten — enerwaars mutten wi ja  
binanner komen, un waarom denn neet in disse moje Kroog?  
Un mit sovööl leve Minsken!

*(Hier in mien Manuskript steiht: **Applaus!**)*

Nee, wieder!

Wat mi verbaast, wat ik haast neet begriepen kann, is dit:  
De eerste KEERLKE gaff dat 1993 un de gung an Gitta Mennenga.

Man wat hebben de Tieden sük verannert!

Gitta Mennenga heet nu al lang Gitta Franken,

un waar een froger mit 'n **Keerlke** tofree was,

mutt d'r vandaag nu nödig ok 'n **Wievke** her ...

-- Mag je vannavend nett nochmaal good gahn ...

wenn ik mi nu langsam heran arbeiden doo an de **Minske**,

de hum kriggt un over de ik denn ok van HUM proot --

of is 't 'n **Persoon**, over de ik denn van HÖR proten mutt,

de hum, dat Keerlke, kriggt?

Well kann 't weten!

De Vörstand van Oosfreeske Taal! -- Ja, de weet dat.

Un de een un anner van Jo hett villicht ok 'n VERDACHT --

ja, 'n Verdacht, dat hele Spill lett as 'n Krimi. Un Ji weten:

Daar word de Verdacht eerst up 'n fredelke Minsk lenkt,

so as ik een bün — man ik sall de Keerlke neet hebben,

dat spöör ik, ik lööv sogaar, dat ik dat weten doo.

Denn hebben wi hier Andreas Gerdes,

de hett nett weer so mooi ut sien plattdüütse Vertellsels vörleest,

un wi hebben hier Otto Groote un sien Kulantjes,

man dat dücht mi to einfach,

dat hett Oosfreeske Taal al maal maakt,

dat se de Priesdrager unner 'n Utwendsel,

mit Fiebelquinten, heranhaalt hebben,

man 'n gode Krimi kann neet elke Maal na 't sülvige Muster oflopen.

Daarbi fallt mi nett noch wat bi in: De Keerlke geiht je alltied an en

Minske of Persoon of Instituoön (ok so 'n mooi plattdüüts Woord!),

de besünners wat daan hett för Platt in Oosfreesland.

Un egenlik fehlt daar ja de Tegenpart — 'n Utteken för de, de nix of besünners minn daan hett of deit,  
so as de ADAC siet 1971 de "Sülvern Zitroon" utdeit.

Un 'n Naam för disse Pries hebb ik ok al, 'n Vörslag tominnst:  
Dat **Swientje**. Daar sünd keen Farkens of Biggen mit meent,  
de sünd vöols to nüdelk — dat is de Bössel för 't Groffe.  
Man nett nu is d'r keen Gelegenheit, daar over to diskereeren,  
dat könen Ji later geern, bi 'n Glas Wien of Beer of Water.

Willen Ji denn heel neet weten, well de Keerlke van 't Jahr kriggt?  
(Hier steiht up mien Zedel: **Jewall! Wiss doch! Nu man to!**)

Good. Fangen wi an:

Wovööl Lüü sallen de Keerlke kriegen?

A. Een.      B. Twee      C. Dree.      D. 'n hele Koppel.

Wat Ji menen, hebb ik ruthöört: Een!

Un sall 't 'n Mann of 'n Frau wesen?

A. 'n Keerl!      B. 'n Froominske      C. De Beste.

Un weer hebben Ji 't rechte truffen, drapen of dropen:  
De Beste sall hum hebben!

Disse Persoon --

up wovööl Rebetten mutt se wat daan hebben?

A. up een Rebett      B. up dree      C. up söven?

Un weer mutt ik Jo tostemma:

EEN was je al mooi, DREE is würkelk mojer, man ...

an mooisten is doch wall SÖVEN!

EEN Minsk, un Vörbild up SÖVEN Rebetten!

Wo kann 't angahn!

- Hett he bit nuto al twee Boken\* in de Welt brocht,  
de de Lüü geern lesen?
- Weer he 15 Jahr Penningmester\*\* bi en plattdüütse Firma?
- Schrifft he all nööslang plattdüütse Vertellsels för  
Dagbladen\*\*\* ut disse Kuntrei?
- Sörigt he haast elke Dag tosamen mit anner Schrieverkes un  
Schrievers för dat "Spröökje\*\*\*\* för elke Dag"?

- Hett he dat Leit van en Raadselmakerklottje, waar elke Maant anto 120 Lüü dat Sülvenraadsel lösen?
- Organiseert he all Vördeljahr en Kuntreiversammeln\*\*\*\*\* mit tominnst 50 - 60 Lüü, kunnen ok maal noch mehr wesen?
- Översett he elke Week de hoogdüütse Weken-Angeboden för de EDEKA-Markt Bontjer in Sandhorst in 't Plattdüütse?

**Ja, all dat deit he!**

Wi hebben hier, will 'k hopen, 'n paar Plakaten as Bispill.

Köönt Ji later ankieken. Un kunn Jo anregen, ok sowat to maken.

Un all dat, wat he deit un daan hett,  
 dat deit he för uns plattdüütse Taal,  
 dat deit he ok in Gedenken an Johannes Diekhoff,  
 de hum up disse Padd brocht hett,  
 un dat deit he mit Pläseer un för Jo Pläseer,  
 un sünnner dat he 'n Bahntje hett of ok blot 'n Updracht!

**Andreas Gerdes, du büst 'n Baas van Keerl  
 un daarom kriggst du vandaag de KEERLKE!**

Middels, de 15. November 2019

---

*(Carl-Heinz Dirks, Laudator)*

---

*(Hans Freese, Baas Oostfreeske Taal)*

\* De Boken: "Eerstens kummt dat anners" + "Un tweedens as man denkt".

\*\* 15 Jahr Penningmester bi DIESEL, dat Stiekelbladd up Platt.

\*\*\* För de „Anzeiger för Harlingerland“ (För Jo up Platt) un de för de „Oostfreeske Narichten“ (Unner de Lambertitoorn).

\*\*\*\* Mit veer Schrievers/kes för de ON „Spröökje för elke Dag up Platt“.

\*\*\*\*\* Siet söven Jahr Leit van de Auerker Kuntreiversammeln (bit September tosamen mit Fritz Janssen), all Vördeljahr in 't Familienzentrums Auerk, elksmaal en Referentin of Referent, ruugweg sovööl Besökers, dat d'r noch Stohlen haalt worden mutten.